

四庫全書

史部

欽定四庫全書

通鑑答問卷三

宋 王應麟 撰

漢高帝

樊噲諫急還霸上無留宮中

或問樊噲之諫此興亡之大機也沛公待張良之言而後聽何歟曰噲非謀臣也是以沛公忽而不聽微良之言幾於失天下矣湯始征葛四海之內皆曰非富天下

也為匹夫匹婦復讎也民望之若大旱之望雨吳入郢而處楚之宮鬬辛聞之曰焉能定楚與民同欲則興從已之欲則敗沛公始入關見宮室帷帳重寶婦女遽有留居之意此所謂懷與安實敗名者也未有以收秦民之心而先有富天下之意此心一縱與吳處楚宮何以異哉不惟項羽攻之諸侯誰不仰關而爭者紛華盛麗以樂惱憂志驕氣惰心醉智昏其能戰且守乎孟子曰是動天下之兵也沛公從諫如流還軍霸上三章之約

除苛解饒秦民獻享辭而不受若時雨降民大悅人心  
之歸天命之集也財物無所取婦女無所幸范增知其  
志不在小蓋定天下者存乎志秦於安樂則其志滿耽  
於貨色則其志荒其滿其荒以志之小也志大則公乎  
天下不私乎一身為百世之謀不為一時之謀范增善  
於覘敵闕樊噲武夫也見沛公之失而進諫辭嚴義正  
凜凜爭臣之風乃與子房不約而合其識慮遠矣項羽  
有一范增羽燒秦宮室收寶貨婦女而范增也默無一

言以諫視武夫之噲猶不逮況可以抗子房哉漢有大而興楚無人而亡於斯已決矣雖然人心惟危至可懼也高帝能納諫於咸陽不能不縱欲彭城置酒高會不備不虞大棄其師身危僅免噫罔遊於逸罔淫于樂不役耳目百度惟正此帝王正心之學也惜漢之羣臣無能格君心者

三老董公曰明其為賊敵乃可服

或問胡文定公曰漢初興張子房為韓滅秦以明春秋

復讎之義三老董公請漢為義帝發喪以暴項羽弑君之惡下逮武帝之世時君信重其書學士大夫誦說用以斷決獄事雖萬目未張而大綱克正然則漢王縞素之師假義而行其合於春秋歟曰大者天地其次君臣春秋書宋公陳侯蔡人衛人代鄭示誅亂臣討賊子先治其黨羽之法也書衛人殺州吁於濮以討賊許衆人以失賊罪鄰國也故春秋成而亂臣賊子懼舉一事可見矣陳恒弑君夫子沐浴而朝請討之弑逆人倫之大

變人人得以致討鄰國不討則為佚賊魯之君臣能從夫子之言以正天地之經周道可復興矣而莫之從也魏安陵君曰吾先君陳侯守此地以受大府之憲其上篇曰臣弑君有常不赦戰國時春秋之法猶未泯天叙有典豈以世變改易哉項羽弑義帝負覆載不容之惡鹿走中原相與角逐未有聲罪而將天討者董公正春秋之義明羽之為賊師出有名而人心感動師直為壯而士氣奮勵羽雖暴強懍乎司馬九伐之誅而黨賊之

徒心寒膽落羽欲不亡得乎董公之言不但滅羽而已  
王莽之篡絳衣大冠復高祖之業祀漢配天下失舊物  
曹丕之篡左將軍信大義於天下武侯出師曰漢賊不  
兩立昭昭若揭日月此大綱正人倫明之效也春秋天  
子之事百世以俟聖人而不惑豈不信夫

韓生 酈生

或曰韓生出武關之計酈生取敖倉之策皆所以困楚  
而使之力分食盡也良平之智不及此何歟曰天下有



無窮之才人才有無窮之智惟不自用而能用人者乃能合羣才以為才兼衆智以為智趙奢解閼與之圍而先據北山之謀乃出於軍士之許歷條侯會滎陽之兵而右走藍田之謀乃出於道旁之趙涉信乎才智之無窮古之人所以稽於衆謀及庶人詢於芻蕘也方楚漢雌雄未決競逐於滎陽成皋間迭為謀臣謀臣如雲猛士如雨未知制楚之策也出宛葉掩不備以分其力其謀發於轅生取敖倉絕糧餉以飢其師其謀發於酈生

於是堅壁不戰養銳以待其敝東馳西騖使之疲於奔  
命則轅生之為也鴻溝之分太公呂后之歸因其食盡  
遂收垓下之功則酈生之為也二生之納說非難高帝  
之能聽為難楚兵困而漢業成始於是矣天下固多奇  
士哉然而酈生馮軾下齊不免臨淄之鼎工於謀國而  
拙於自謀固無憾也若轅生說行而身隱鴻飛魚潛脫  
屣圭組遠希魯連近慕董公亦古之逸民歟高於酈生  
遠矣賢者一言濟時救民而爵祿不纓其心不可與辨

士說客並論也嘗觀集古錄後漢表良碑叙其世系云當秦之亂殷居河洛高祖破項實從其策天下既定還宅扶樂蓋轅生陳人濤塗之後良之遠祖也史失其名碑亦闕焉併書以補班史之遺

羽與漢約割鴻溝以西為漢以東為楚

或曰鴻溝之約已定良平復說漢擊羽約可背歟曰此張子房之謀陳平助之而已秦滅韓楚殺橫陽皆子房必報之讎也君臣天經地義之所在子房為漢謀所以

為韓也秦將距峽關既啗以利而欲連和矣子房曰因其懈怠擊之非失信於秦也為韓報秦不可不擊也羽約分鴻溝已解兵東歸矣子房曰今釋弗擊是自遺患非失信於楚也為韓報楚不可不擊也子房義與秦楚不共戴天必殄滅之以伸其志大義為重小信為輕矧羽也智勇俱困兵食俱竭一日縱敵數世之患也縱之不攻則子房不能雪橫陽之恥漢王亦不能據義帝之憤矣故合信越之兵於固陵多助之至恭行天爵決勝

垓下獲醜東城漢王縞素出師之舉子房間行歸漢之心凡以為此耳昔者孔子至蒲會公叔氏以蒲叛衛止孔子曰苟無適衛吾則出子孔子許之盟而出遂適衛子貢曰盟可負乎子曰要我以盟非義也夫蒲人之盟猶可負則峽關說而復擊鴻溝約而再攻為君復讎也奚議焉

叔孫通起朝儀

或曰叔孫通所制儀漢史謂之儀法謂之儀品今可攷

歟曰經禮三百曲禮三千所謂天秩有禮也春秋時晉不知穀烝魯不知尚羔去籍于戰國火于秦而禮大壞矣叔孫通之朝儀頗采古禮與秦儀雜就之是儀也非禮也通豈能知古禮哉太史公謂秦采擇六國禮儀其尊君抑臣朝廷濟濟然則野外所習長樂宮所行皆秦法也在易上天下澤履君臣之尊卑有常然而乾下坤上為泰上下交而志同尊卑未嘗闊絕也至秦尊君抑臣以商鞅之法廢周公之典若體貌大臣而厲其節尊

德樂道臣其所受教鹿鳴之賓其臣伐木之友其賢此  
意不復見僕隸之臣諾諾唯唯頓首而請昧死而言為  
火水之未濟而三陽失位為天地不交之否而天下無  
邦秦祚弗延職此之由漢可以監矣而械繫及於相國  
獄吏貴於功臣賈生有堂無陛之歎此叔孫通襲秦之  
罪也雖然通俗儒也馬知禮自西晉之亂典籍泯絕而  
班固所上漢儀十二篇湮滅不傳沈文阿所云奠贄不  
珪致享無帛公王同璧鴻臚奏賀今亦不可考三禮疏

引通所作漢禮器制度唐初尚存今學者不知其名物也矧三代之禮乎六經樂已亡而禮無全經雖漢禮與律令同錄者猶不得見之有志古學者所為發憤太息也

陳平六出奇計

或問陳平六出奇計其事可悉數歟曰古之謀人本於正而奇生焉後之謀人出於奇而詐生焉正而為奇猶不失其正也奇而為詐一時之利悠久之害也夫子以



正譎論齊桓晉文若陳平之奇亦晉文之譎歟以平傳  
改之所謂奇計者大略可睹其間楚亞父也敵國相傾  
之術李斯尉繚之故智不足以爲奇也其夜出女子榮  
陽東門也使無紀信捐軀誑楚平之計亦不得施矣君  
臣以義相投以信相孚熊羆之士不二心之臣所以保  
乂王家也偽游雲夢以禽韓信是教高帝以詐也君疑  
其臣臣貳于君叛者並起高帝傷于黥王之矢偽游之  
計實啓之至於平城秘計特救急之下策耳匈奴見羸

弱而伏奇兵以平之多智曾不如一婁敬既無料敵之  
謀又無制勝之術至於危地而後為不得已之計作史  
者諱而不言以為世莫得聞其秘也乃所以為恥也舉  
四事而觀它可知矣奇不失正其唯子房乎平終身奇  
譎謀兵則有餘謀國則不足廷爭不若王陵之正誅呂  
不若絳侯之果其以功名終幸也

陸賈前說稱詩書

或曰詩書火於秦天下無誦之者漢興陸賈始以雜說

賈其為儒者歟曰學之為王者事久矣高祖不知學也當時言詩有齊浮丘伯高祖過魯其弟子申公從師入見于魯南宮而高祖不能用也言書有濟南伏生教于齊魯之間至孝文時乃詔掌故往受之而高祖未嘗問也浮丘隱而不見伏生耄而後有聞此高祖不學之過也古者立教造士莫先乎詩書陸賈辯士也耳剽口誦而稱述之若二南之正始二雅之言正典謨訓誥之軌範帝王所以修身齊家治國平天下者賈何足以知之

其言湯武以為逆取順守此戰國駁雜卑陋之說其著  
新語不過秦漢之失得不以堯舜之道告其君不以孔  
孟之訓格其君賈馬得為儒者哉挾書之律未除遊學  
之路未廣大風之歌曰安得猛士而已求賢之詔曰賢  
士大夫肯從我遊而已通經學古之士不在列也次律  
令申軍法定章程制禮儀孔氏六藝之傳不得與也孝  
文好刑名黃老而詩書以異端廢孝武有表章之名而  
詩書以空言廢孝宣有講論之名而詩書以法律廢是

詩書之道未得一試所存者章句訓故爾漢終於雜霸  
道而士以經術為祿利之資程子曰道不行百世無善  
治學不傳千載無真儒亦可歎夫

置酒沛宮擊筑自歌

或問文中子曰大風安不忘危其霸心之存乎何以為  
霸心也曰高帝以猛士取天下而思得猛士以守之其  
心則霸者之心也昔者成湯敷求哲人俾輔于爾後嗣  
旁求俊彥啟迪後人武王詒厥孫謀以燕翼于周公曰

繼自今後王立政其惟克用常人王者守天下之道如此若猛士可與除亂不可與守成秦有王翦蒙恬非無猛士也其效可睹矣呂后之悍戾太子盈之柔弱帝屬意於趙王如意之類已適庶之分未定變故適在閨闈不在四方萬里之遠求天下之真賢實德以輔翼太子嚴內外之辨以抑母后與政之萌事無大於此者夫子緩頰史而急蕭牆帝豈未之思乎且漢所謂猛士莫若越布敖功高猜貳相繼夷滅韓信陳豨襲跡而動故人

之綰亦不自保猛士其可恃以守天下乎疆如周昌不能留趙王之行智如子房僅能致商山之老帝何以為歲暮之託乎帝之詔有曰王者莫高於周文伯者莫高於齊桓皆待賢人而成名夫周文之事非帝所敢望齊桓身後之旤帝亦念及此乎是以知王道悠久而無弊霸功淺近而易毀此霸心所以為高帝累也君子臨大節而不可奪可以託六尺之孤寄百里之命非武猛者所能也在易師之上六開國承家小人勿用一於用猛

士而不慮其必亂邦此唐太宗誤於託李勣也漢之大臣知事君之義者一王陵爾而不能止諸呂之不王他日平勃之謀幸而成否則漢其殆哉

過魯祠孔子

或問高帝不修文學何以祠孔子曰聖人之道萬古如日月戰國自紛爭秦自阮焚不能晦其明也易剥之上九曰碩果不食在天地未嘗一日無陽在人未嘗一日無天理剥盡於上復生於下道不可終泯也太史公曰



高帝誅項籍舉兵圍魯魯中諸儒尚講誦習禮樂弦歌之音不絕豈非聖人之道化好禮樂之國哉然則帝之過魯而祠孔子亦有感於斯乎帝雖不說儒學然約法三章代虐以寬此三代得天下之仁三軍縞素為義帝東伐此三代取天下之義其天資暗合於儒儻有真儒若孟子者引之當道使之經綸大經建立大本正家以法遇臣以禮興起先王之遺文措之事業則孔子之道可以復行漢其三代矣惜也帝之所用如叔孫通陸賈

之徒陋儒俗學不能以道致君而尊崇前聖之美意不得見於為治之實用蓋非漢廷諸臣論卑識淺不足以佐下風歟張宣公有言高帝資質最與儒學相合而最不喜學武帝元帝最號為喜儒而最與儒學相背兩者常相違而恨魯二生不為高帝一出也其知言哉吁上不聞道之要下不被至治之罪漢無真儒故也

欲易太子

或問高帝從諫如順流至欲易太子何諫者之不入歟

曰帝王正心之學不明久矣仲虺誥成湯曰以義制事以禮制心垂裕後昆所謂制心者明天理以遏人欲使心有所制而不敢肆也高帝誅秦蹙項功軼千古而困於一女子之娛欲以孽代適大功易立而本心難保人欲易流而天理難持一念之敬肆天下安危存亡之大幾也張良叔孫通從容啓沃不務格非心於未萌攻邪心於未縱而力爭於已然難矣然而高帝之心不盡蔽也張良招四老人帝幡然而改創業垂統之初幸而無

失雖不能正其心而本心之明猶在也光武中興之君  
而以私愛易儲嗣唐太宗之英武而廢立之際幾不能  
自決是又在高帝下矣

惠帝

舉民孝弟力田者復其身省法令妨民者除挾書

律

或曰此三者皆為政急務蕭何為相未之行也曹參而  
後行之然則曹參不但守蕭何之法歟曰秦項既平叛

亂繼起蕭何知秦之敝而未暇革也曹參相惠帝則天  
下略定矣流大漢之愷悌蕩亡秦之毒螫叅之所行亦  
蕭何之舊規也自商鞅令民父子兄弟同室內息者為  
禁而民不知有孝弟秦北為長城之役南有五嶺之戍  
頭會箕歛財匱力盡而民不知有由田於是始舉孝弟  
力田者復其身自時厥後置孝弟力田二千石者一人  
高后之元年也置三老孝弟力田常負文帝之十二年  
也復孝敬則武帝元朔元年之詔賜孝弟力田帛則元

符元年之詔皆自是啓之海內殷富興於禮義繇此而致也自鞅斯趙高任殘賊之吏行督責之術漢興秩荼凝脂之慘未盡洗也於是始省法令妨吏民者自時厥後除妖言令高后之元年也除收帑相坐令除誹謗律文帝之元年二年也除錢律除田租稅律戍卒令又見於文帝之五年十三年風流篤厚禁罔疏闊繇此而致也秦律敢有挾書者族高帝不好詩書尚仍秦舊伏生之書藏而未出浮丘之詩私相傳習高堂之禮賓公制

氏之桑皆湮鬱未發自秦焚書至是二十三年自漢滅秦至是十有六年藏書之禁始除然守文之君當塗之士鮮以收拾遺經為意河間獻王始得古文先秦舊書周官尚書禮記之屬立毛氏詩左氏春秋博士武帝始建藏書之策置寫書之官成帝始陳發秘藏校理舊文鄉使入闕之初收博士官所職之書三章之約併除挾書之律則口授不至缺謬壁藏不至斷爛二三載籍之傳周孔制作之文不若是之泯也雖然曹參能行此三

者亦可以為賢相矣

張辟彊謂陳平曰請拜吕台吕產為將居南北軍  
諸吕權由此起

或問李德裕謂授兵產祿幾危劉氏皆因辟彊啓之其  
然歟曰辟彊孺子焉知國家大體為吕氏謀不為劉氏  
謀也陳平畏死患失而從之不幾於一言而喪邦乎平  
當危疑之際倘能以社稷存亡為己休戚何至遽以兵  
柄屬后戚哉平巧於謀身而慮不及國一聞辟彊之言



喜於脫禍而國事不暇恤焉得智劉寒如灰呂沸如湯  
平之罪大矣所謂大臣者從正而不從邪為義而不為  
利平無所不從又具臣所不為也呂氏之權陳平實起  
之王氏之權張禹實起之武氏之權裴炎實起之三臣  
之罪一也邨夫可與事君哉漢以南北軍相制衛宮之  
兵在城內者為南軍若唐之諸衛也衛城之兵在城外  
者為北軍若唐之左右羽林也昔者成王之顧命召公  
命仲桓南宮毛仲爰齊侯呂伋以二千戈虎賁百人逆

子釗于南門之外發命者冢宰傳命者二臣承命者師  
尚父之子也兵事之嚴防危慮患之密若此今也惠帝  
殂而名他人之子宫中已有非劉氏而帝者大臣媮合  
苟容惟呂氏之聽悉舉中外兵權以授之高帝之業且  
墜於地誰執其咎以四皓調護太子之功議者猶謂軍  
中不左袒則四皓之安劉乃所以滅劉也況陳平之從  
辟彊謀身不謀國為呂不為劉其能免於首禍之名乎  
異時誅呂之功不足以贖黨呂之罪董子曰為人臣者

金史四庫全書  
不可以不知春秋守經事而不知其宜遭變事而不知其權雖然平不足道也王陵周勃於此時領南北軍以刺諸呂喻中外以高帝之威德孰不雲合響應漢宗不至於幾亡矣惜陵勃之失此機也

高后

議欲立諸呂為王

或問王諸呂之議王陵既爭陳平周勃又爭之其事可以已乎曰非劉氏而帝者諸臣奉而君之無異辭非劉

氏而王者或從或否不係漢之存亡也其失在於以兵柄授呂氏太阿在手孰敢嬰其鋒曰帝而帝曰王而王拱而聽之爾春秋魯國之賊皆先得兵權而後動於惡公子翬再為主將專會諸侯不出隱公之命公子慶父主兵伐邑於莊公即位之二年仲遂摠兵兩世入杞伐邾會師救鄭始於擅兵終於無君春秋書之為萬世戒呂氏將南北軍其為翬慶父遂之帥師也大矣陰凝冰堅異姓偃然為帝何有乎白馬之盟王陵爭之於末何

益哉外戚握兵未或不危亡王莽之為大司馬竇憲梁冀何進之為大將軍不防於微不辨於早威權既奪而國從之自呂氏始也呂后稱制八年再易主若委裘職諸王若刈草幸其自斃產祿皆庸人平勃得以收其功不可以為人臣之法

勃入軍門令曰為呂氏右袒為劉氏左袒軍中皆左袒

或問為呂氏右袒為劉氏左袒袒有左右何也曰儀禮

鄉射疏云凡事無問吉凶皆袒左是以大射及士喪禮  
皆袒左唯有受刑者袒右故覲禮云右肉袒注云刑宜  
施於右是也以此攷之太尉勅誅呂氏之計已定為呂  
氏者有刑故以右袒今之軍中於是皆左袒而為劉氏  
效義者有賞背義者有刑太尉之令嚴矣非以覘人心  
之從違也高帝之餘澤在人者未遠呂氏之餘威強脅  
而莫從北軍已屬太尉城外之兵皆為漢用矣南軍雖  
猶屬呂產而無外兵之援產至殿門弗得入則宮中宿

衛皆漢之兵矣齊王襄倡義于東榮陽之將待變於外  
諸呂已為几上肉故太尉先入北軍猶張東之用羽林  
以復唐也將相同心慮無遺策或以左袒之令為非蓋  
未攷古禮爾

代王即位入未央宮夜拜宋昌為衛將鎮撫南北  
軍以張武為郎中令行殿中

或曰文帝入未央宮用自代來者摠兵柄不如唐裴度  
之入蔡也曰自世變之千古而人君不得不操天下之

大權夏書曰惟仲康肇位四海胤侯命掌六師夫子錄之為萬世訓兵者國之神器君之大柄福威惟辟征伐自天子出罔不在初詰爾戎兵張皇六師雖成康之隆儆戒不忘況大變之甫定乎漢南北軍在京師郎中令掌禁衛始也權移於呂氏今又權歸於大臣平勃雖忠然處變與處常異常時則君臣之分定權在上而不在下有變則大臣擅立君之威不亟收之則君弱臣強之漸將不可制文帝夜拜宋昌以收兩君之權張武行殿



中以收禁衛之權乾坤開闔風雷迅厲一夕而軍國之紀綱以正君臣之堂陛以嚴雖有示人不廣之迹其意則天下之至公也帝之此舉若私於用親臣實所以全大臣故平勃皆以功名自終若宣帝之待霍氏光為大將軍子為中郎將兄孫領胡越兵壻為東西宮衛尉假其權以養其惡優之乃以害之然則文帝其可輕議哉

文帝

有司請蚤建太子

或問文帝元年有司何以即有建太子之請曰太子天下之本本正而天下定高帝初為漢王二年立子盈為太子此漢之家法也以高帝之豫定猶牽於如意之愛惠帝繼嗣不明遂有易姓之變稱制之僭厥監不遠有司所以固請也呂獻可諫行議建儲貳之賞謂漢史載豫建太子但云有司不著其人訖景帝世不聞賞建言者言之是公於天下賞之者私於已也蓋漢俗近古上無私恩下無貪功與後世異矣然文帝知豫建而不知

豫教周勃灌嬰知為竇氏擇師傅而不知為太子擇師傅也用智慮之術所習者刑名逞博局之忿所尚者刻薄賈誼選端士正人之言聽之藐藐也帝王之學不傳而垂裕詒謀詩書所稱有愧焉文帝天資粹美豈大臣無以格其心歟自漢而下人君以建儲為諱若唐之宣宗後唐之明宗其終也宦寺擅制君之權宮闈起稱兵之禍是皆不學之過也古者不諱危亡賈誼謂生為明帝沒為明神朝委裘而天下不亂又曰萬年之後傳之

老母弱子將使不寧文帝不以為諱彼諱言建儲者其能長有天下乎文帝可謂知為君之道矣

還千里馬令四方毋求來獻

或問文帝却千里馬而不受四方之獻其後人給家足衆庶街巷有馬然則一馬之還可以致天下之富歟曰文王不敢盤于遊田以庶邦惟正之供西旅貢獒召公訓于武王曰犬馬非其土性不畜珍禽奇獸不育於國文帝之詔與聖王之事古大臣之訓若合符節昔者穆

以八駿荒晉以小駟敗楚以兩廂與幾亡冀之北土馬之所生平公恃之以棄國馬足以行軍公馬足以稱賦不是過也夫受一馬之獻若未為民害而一心之微衆欲攻之四方聞風爭以珍奇中其欲怠荒驕逸由是而生愁怨離畔由是而起此屈產所以亡虞也武帝因大宛之馬窮征遠討發卒十八萬及其軍還入玉門者纔萬餘人得善馬數十匹而已所重者畜馬所輕者民命人君可不謹所好哉吁文之殷富武之虛耗可以鑒矣

昭德塞違以臨照百官文帝有馬此帝所以為仁也光武以千里馬駕鼓車其克紹祖烈者歟

問一歲決獄錢穀

或曰決獄錢穀勃曰不知平曰有主者然則平為知體體歟曰為治之體有司治其詳大臣治其要忽其事而不知者非也諉其責而不預者亦非也周公作立政曰其勿誤於庶獄惟有司之牧夫言刑之重也周官大宰以九式均節財用言財之重也惟刑與財各有攸司而

周公實治其要司寇蘇公式敬由獄以長王國周公特告太史以為後法重民命以培邦本也無逸之戒以萬民惟正之供常貢正賦之外無橫斂也一刑或誤民生必傷一費不節民生必困周公豈徒曰論道經邦燮理陰陽而念不到此哉夫一歲決獄可以見法之繁簡俗之厚薄一歲錢穀可以見國計之盈虛黎元之息耗此真宰相之事勃之少文固不知其職平乃責之廷尉治粟內史是亦未知其職也獄寬而放紛財聚而愁怨其

可理陰陽順四時乎明刑協中非臯陶懋遷粒民非禹  
稷而曰卿大夫各得任職可乎當是時秦之餘俗未改  
公私之積可痛平為大臣莫之省憂也知治體者漢相  
唯魏相而已四方異聞逆賊災變輒奏言之且言風俗  
尤薄殺父兄及夫者凡二百二十人不曰責在廷尉  
也奏發倉廩振乏餒所以周急繼困故事詔書凡二十  
三事量入制用以備凶災不曰責在治粟也若陳平之  
言其流弊將為王衍房琯之清談矣王制曰大司寇以



獄之成告於王王命三公叅聽之又曰冢宰制國用必於歲之杪王制者文帝時博士諸生所作也是為宰相之職愚謂文帝之問為切問陳平之對為空言

上聞河南守吳公治平為天下第一召以為廷尉或曰吳公故與李斯同邑而嘗學事焉史謂孝文好刑名之言吳公之召豈以刑名之餘習歟吳公薦賈誼而史謂誼明申商亦有所合歟曰按公卿表孝文元年吳公為廷尉三年張釋之為廷尉攷之本紀三年除收帑

相坐律令二年除誹謗詆言之罪皆吳公為廷尉時也  
秦之苛法密網至是盪滌豈有刑名之習哉循吏傳稱  
吳公謹身帥先居以廉平不至於嚴而民從化豈可以  
學事李斯而議其疵哉吳公之後繼以張釋之蓋孝文  
天姿寬厚欲平獄緩刑曷嘗以刑名為治哉漢朝之儒  
唯賈生其言權勢法制人主之斤斧不能不雜於中商  
吳公稱其通諸家之書非以明申商薦之也吳公雖無  
傳而廉平不嚴為循吏之首其在廷尉如陽春之解陰

凌斯民生意既剝而復善政無赫赫之名所以為賢歟  
苟卿之徒有李斯李斯之徒有吳公賢不肖在人不在  
師傳也

賈山上書

或曰賈山借秦為諭漢興以來上書者始見於此潁陰  
侯灌嬰武夫也而騎從者有斯人焉文帝不能用何歟  
曰賈山祖父祛故魏王時博士弟子蓋家庭之講習文  
獻之漸濡嘗聞先生長者之緒言矣謂秦亡養老之義

亡輔弼之臣亡進諫之士言秦之失者未有切於此也  
定明堂造太學修先王之道風行俗成萬世之基定自  
孟子之後斯言絕響一旦聞韶簡之音鳳皇之鳴焉謂  
士修於家而壞於天子之庭其言偉然可以起衰俗而  
激頽波非豪傑之士能之乎雖有唯陛下所幸之語開  
人君自恣之端然片言未醇不足以累大體也其後除  
鑄錢令在五年之夏山復上書諫而帝終不用史但云  
終不加罰以廣諫爭之路而已山之才亞於賈誼其學

粹於鼂錯帝以日食之災詔舉賢良方正能直言極諫者而嘉言讜論如山者乃不見錄又何賢良直言之求乎噫賈山為騎於灌嬰與馬周之客於常何一也常何能言馬周而灌嬰蔽賢不能舉不足論也文帝受言而遺賢不能若唐太宗之用馬周豈君臣遇合之難歟山之稱詩曰濟濟多士文王以寧儒者鬱於戰國危於暴秦至漢猶未獲伸穆生白生中公韋孟在楚轅固胡毋生在齊帝能招延而咨訪焉則多士以寧之效庶幾周

之盛矣惜帝之不能為文王也士生於文王之後者其  
不過可勝數哉

賜民田租之半

或問古者什一而藉什一者天下之中正也多乎什一  
大桀小桀寡乎什一大貉小貉文帝賜民田租之半不  
幾於貉道乎曰秦簡公七年初租禾田之有租始見於  
此董仲舒謂秦除井田田租二十倍於古漢高帝輕田  
租十五而稅一則儉於周矣漢初接秦之敝民多背本

趙末賈誼說文帝使末技游食之民轉而緣南畝於是  
開籍田以率耕又賜今年半租二年之詔也晁錯言地  
有遺利民有餘力欲民務農在於貴粟使人入粟於邊  
以受爵免罪邊食足支五歲郡縣足支一賜於是賜農  
民今年租稅之半此十二年之詔也明年除田之租稅  
以積粟之多也文帝兩詔賜今年半租未以為常法也  
孝景二年令民半出田租三十而稅一則以為常法矣  
然而都鄙廩餘皆滿太倉之粟充積露積腐不可食君

民兼足亦曰節儉而已故為國以利為本未有不利於國也以利為利未有不利於國也有子曰百姓足君孰與不足於文景見之世祖中興之初師旅未解用度不足乃行什一之稅建武六年軍士屯田糧儲積給詔三十稅一如舊制蓋自孝景之後遂為定制也若年穀不登則毋出田租郡國被災什四以上則毋收田租大旱則勿收田租史不絕書此文中子所以稱漢制盡美於卹人歟



虎園嗇夫口辯

或曰嗇夫代上林尉對亦盡職之吏也而張釋之言其利口捷給則尉之默默可取歟曰變風俗者必尋其原商俗之敝在於尚言也伊尹以辯言亂政戒其君盤庚以度乃口告其民商俗靡靡利口惟賢餘風未殄康王所以命畢公也周公作立政曰勿以儉人成王作周官曰無以利口亂厥官所以反商之敝也自戰國縱橫之士掉三寸舌以簧鼓諸侯秦廢詩書崇法律君子長者

之道微俗吏刀筆之習勝巧言鮮仁者衆木訥近仁者寡利口覆邦家若崩通之流飈馳波漫雖絳灌以功臣為相少文多質而其舊染未易革也進一嗇夫則陰膚刻覈之士攘臂而起何以成忠厚豈弟之化釋之一言是為漢四百年永命之本告訐易而禮義興其機在此萬石君不言而躬行李廣恂恂如鄙人口不能出辭風俗之篤厚人才之淳實如此武帝以後氣象大異汲長孺不能用而用多詐之公孫弘舞知之張湯長者之言

不復聞而漢道衰矣噫言顧行者為君子才勝德者為小人不惟人君用人之法亦學者取友之戒

張蒼為丞相

或問張蒼好書博聞以文吏為相非絳灌比也而不聞興起儒者之學何歟曰儒者不用於世久矣劉向別錄云虞卿以春秋授荀卿荀卿授張蒼然則蒼所學者春秋所師者荀卿也漢初左氏傳出蒼家則蒼之學不止律歷也明春秋之義以佐其君正綱常辨名分決大事

斷大疑經綸天下之大經嘉以春秋為本德則漢可以  
為帝王之治攷之於傳不過推漢為水德推律調音以  
定法令程品而已而未嘗以春秋之學施之政事淮南  
王長之罪蒼嘗議之而輒論如法之奏不能全兄弟之  
恩也肉刑之除蒼又議之而外有輕刑之名內實殺人  
不能廣欽恤之仁也蒼自秦時為柱下御史止於明習  
圖書計籍賈生所謂大臣特以簿書期會為大故者安  
能以聖人之遺經措之相業哉其後公孫弘以春秋之

義治臣下取漢相是以聖經為司空城旦書也夫子制春秋以俟後聖其終不行矣夫

周勃下廷尉

或曰絳侯有誅呂安劉氏之功文帝下之廷尉不以議功少恕微薄太后之言亦曰殆哉或謂帝之繫絳侯所以全之其然歟曰遇大臣以禮待功臣以恩未聞係縲而困辱之也漢襲秦法君臣之際不以禮義相接韓彭誅夷之慘鄭侯械繫之暴高帝不能改於秦也至文帝

習以為常帝之疑絳侯始於非社稷臣之對繼以率列侯之國之詔君臣之義已睽上下相疑而被甲持兵之事起雖張釋之為廷尉而獄吏之貴自若此路溫舒所謂秦有十失其一尚存者也帝因賈誼之言養臣下有節然古者師友其臣漢直以徒隸視之景之於周亞夫武之於竇嬰元之於蕭望之成之於王商哀之於王嘉挫折捽抑至東都而益甚豈非高文詒謀之失歟或曰張釋之於犯蹕盜環則爭之絳侯之繫不問其抗奏也

爭於小而不爭於大豈亦視以為常歟曰太史公謂積威約之勢自商鞅李斯以是為常法漢之君臣恬不知怪張蒼為相未嘗救文帝之失明絳侯之忠況廷尉乎故曰漢襲秦之罪大

除盜鑄錢令

或曰除盜鑄之令以不能禁吳鄧不若不禁也曰吳王濞即山鑄錢尾大難制謂之不能禁可也鄧通一幸臣賜以銅山使之自鑄是與人主分富貴之柄也周官予

以馭其幸此豈所當予歟他日申屠嘉為相檄召困折之如待奴隸何不可禁之有盖文帝仁厚欲省刑罰滌煩苛故除其禁非為吳鄧也自湯鑄幣周立圜法有泉布之名有輕重之權民不得專其利也秦惠王二年初行錢始皇三十七年復行錢漢興以秦錢重難用更令民鑄英錢文帝為錢益多而輕更鑄四銖蓋以錢輕而多偽非嚴刑峻法所能止莫若更其制而得輕重之中弛其禁而省刑辟之繁毘錯謂鑄錢者除為寬大令



人其知之矣武帝更以鹿皮白金更以三銖赤仄不但吏民犯禁之多而太常不收赤仄者為城旦汝南太守不用赤仄為賦者為鬼薪則法令之密可見矣自造白金五銖後五歲而赦吏民坐盜鑄金錢死者數十萬人以是觀之文帝除盜鑄之禁以紓天下之民豈不仁哉

賈誼上疏

或問賈誼言可為痛哭者一謂諸强大也也新書分為七篇何歟曰朱文公謂新書乃其藁草也又問可為流

涕者二其一謂匈奴有可制之策而不用也其闕不載

於傳何歟曰新書論足食勸農者是流涕之闕而班史

載之食貨志論制匈奴凡二篇實一事也闕食勸農

為二又問顏師古曰可為長太息者六闕而止蓋史

取其策要者呂成公曰見於傳者有闕風俗也教太

子也體貌大臣也其三可得聞歟曰新書言庶人上僭

班史取為太息之一秦俗經制二篇不以為太息而班

史取為太息之二言教太子是為太息之三言體貌大

臣是為太息之四等齊篇論名分不正銅布篇論收銅  
鑄錢此二者皆太息之說班史削等齊不取而以銅布  
載於食貨志總而言之太息者六燦然可見矣昭帝通  
傳傳今在大戴禮蓋以新書傳職保傳胎教教客經四  
篇合為一朱文公謂當時以列於論語孝經尚書而進  
於君蓋識其言之要者今攷是篇有學禮有明堂之位  
有青史氏之記載於傳者其略也嘗觀誼之疏於禮義  
廉恥反復言之曰商君遺禮義曰不知反廉恥之節仁

義之厚曰棄禮義損廉恥日甚此言薄俗之未變也曰  
廉恥節禮以治君子曰頑頓亡恥集詬亡節廉恥不立  
且不自好曰俱亡恥俱苟妄曰上設廉恥禮義以遇其  
臣曰此厲廉恥行禮誼之所致此言遇臣之有節也  
堯仲霸者之佐誼誦法孔子者也而以堯氏四維告其君  
蓋風俗根本實係乎此然禮義所該者廣廉恥所指者  
切未有不顧廉恥而能修禮義者也論語曰行已有恥  
可謂士矣儒行曰砥厲廉隅此士之所以異乎凡民也

戴天履地而為人誦詩讀書而為士而棄禮義捐廉恥  
無以異乎秦之民亦可愧哉誼有經世之才所言皆漢  
之治體唯此四字可為學者之藥石而廉恥又立身之  
大節人之所以為人士之所以為士舍是則違禽獸不  
遠矣責其耻舍車而徒君子喻於義也舍爾靈龜觀我  
朵頤小人喻於利也賈生有審取舍之說學者亦必審  
於斯

除秘祝

或問祕祝移過於下其秦所以亡乎曰湯誥曰萬方有罪在予一人泰誓曰百姓有過在予一人無逸曰小人怨汝詈汝皇自敬德厥愆曰朕之愆此以民之過為己之過也湯改過不吝說命曰無恥過作非惟恐過之不知知而不改也楚昭王赤雲之災不移於股肱孔子以為知大道宋景公熒惑之變不移於相與民子韋以為有君人之言過其可移乎秦禁誹謗誅詆言民怨而弗恤惡稔而弗聞李斯分過而秦之罪不分於李斯也祝

金史卷一百一十五  
卷三  
官移過而秦之禍不移於羣臣也禹湯罪己其興也勃  
焉獲罪於天無所禱也秦之愚不亦甚乎文帝之詔曰  
禍自怨起福由德興百官之非宜由朕躬古帝王之盛  
心也詩云自求多福又云求福不回文帝有焉祠官致  
敬無有所祈謂歸福朕躬不為百姓朕甚愧之可謂正  
辭而無愧矣其顧命曰常畏過行以羞先帝之遺德惟  
年之久長懼于不終可為敬德而惟一矣武宣之後黷  
於祭祀何足以進於文帝之盛德哉

擊匈奴逐出塞即還

或曰文武遣將擊匈奴逐出塞而還不壹大治之何歟  
曰六月之雅薄伐獫狁至於太原言盡境而還鼓之而  
已常武之雅徐方不回王曰還歸言振振而歸武不可  
黷也帝即位之初將軍陳武等議及士民樂用征討以  
一封疆帝曰堅邊設候結和通使休寧北陲為功多矣  
且無議軍二十三年之間治外規摹不易於此匈奴入  
寇遣灌嬰擊走之不窮追也單于遺書報以無負約不



逆詐也募民徙邊而備禦固積粟塞下而兵食豐先為自治之謀隱然安疆之勢張相如之長者藥布之烈士並為將軍非生事要功者也逐之出塞亟命還師六月常武不專美矣然帝未嘗一日忘武事也馳射上林勞軍細柳戎兵之事不敢怠弛也知孟舒於田叔得魏尚於馮唐封疆之臣不敢遐遺也嚴尤謂周宣得中策若文武之待匈奴今邊備守不發兵深入同符周宣尤不稱文帝何哉

晁錯對策高第

或問文帝二年詔舉賢良方正直言極諫制舉自此始然未有應是詔者十五年再舉始得一晁錯何其才難歟曰書云敷納以言言非文辭之謂也或以德進或以事舉或以言揚不顯乎言也以文取士自文帝始帝親策三道之要問四者之闕將以廣箴諫之途求經濟之實也錯乃對以親事法官之邪說大功數十之諛辭豈虛心待賢之意哉武帝以後若公孫弘又在錯下文

中子稱洋洋鼂董公孫之對蘇氏謂西漢以文設科而文始衰鼂董公孫之流皆有科舉之累言有浮於其意而意有不盡於其言愚謂董子非鼂公孫之儔也尚論者當有區別賢良方正大讜直在漢一董仲舒在唐一劉蕡而止耳其他則科舉之空言場屋之小藝不足觀已

新垣平言汾陰有金寶氣意鼎出乎治廟汾陰欲祠出鼎

或問新垣平言汾陰出鼎至武帝時鼎果出於汾陰平乃以詐誅何歟曰平既誅而方士之誕復用於武帝之時汾陰得鼎安知非方士之飾詐欲以神新垣平之術乎司馬公作原命曰天道精微非聖人莫能知睦孟知有王者興於微賤而不知孝宣乃欲求公孫氏禪以天下翼奉知漢有中衷阨會之象而不知王莽乃云洪水為災西門君惠知劉秀當為天子而不知光武乃謀立國師公劉秀亦更名以應之皆無益於事以是觀之

數術之言驗於後者猶若此況新垣平玉杯之詐已見其誅宜矣是以怪神聖人所不語奇袤之術君子遠之

申屠嘉責鄧通

或問申屠嘉為相之威風折辱幸臣而幾殺之亦文帝有以重其權歟曰古者侍御僕從罔匪正人出入起居罔有不欽奄寺嬪御之政宮中之次舍王宮之士庶子皆領於冢宰之言此周公輔導成王之法修身齊家清明純粹以為平天下之本大臣格心之學莫先於此至

秦而大臣不得議近臣丞相受制於中車府令外內之  
踈昵不侔矣漢高帝近一宦者而大臣不得見樊噲是  
以有排闥之諫文帝能使幸臣畏宰相而朝廷肅然有  
泰山喬嶽之重申屠嘉可謂有古大臣之節文帝不學  
周官暗與之合英主之所行也逮景帝時內史錯貴宰  
而嘉自絀丞相之權始輕周亞夫議徐廬等謂丞相議  
議不可用而丞相遂無權逮武帝重中朝而輕外朝嚴  
助等與大臣辨論而公孫弘素絀石慶請治近臣所忠

乃受其過贖罪而丞相充位矣又其甚者王嘉奏董賢而不免於禍東都三公之權移於臺閣楊秉劾奏中常侍尚書召掾屬問以公府外職而奏劾近官經典漢制有故事乎秉對以申屠嘉詰責鄧通文帝從而請之漢世故事三公之職無所不統於是尚書不能詰然而若秉之舉其職者鮮矣諸葛武侯謂宮中府中俱為一體不宜偏私使內外異法此出師一表所以與伊訓說命相表裏歟抑嘗謂文帝之明能斥鄧通而去之則通亦

不至餓死惜帝不能遠佞人也

遺詔短喪

或問胡氏云短喪之詔謂吏民也景帝自短三年之制是薄於君父自景帝始其論正矣漢之羣臣於其親不行三年之服豈亦文帝為之歟曰翟方進後母終既葬三十六日除服起視事以為身備漢相不敢踰國家之制薛宣為丞相其弟脩持母服宣謂三年服少能行兄弟相駭是漢相不行三年之制也安帝詔大臣得行三



年喪建光中尚書奏孝文定約禮之制光武絕告寧之典宜復建武故事陳忠上疏謂高祖受命蕭何創制大臣有寧告之科合放致憂之義建武帝大臣不得告寧羣司營祿念私循循三年之喪以報顧復之恩宦豎不便忠奏遂寢是大臣之服正於高祖變於文帝建武又絕之安帝復行而又廢也安帝紀元初三年初聽大臣二千石刺史行三年喪建光元年復斷大臣二千石以上服三年喪桓帝永興二年初聽刺史二千石行三年

服永壽二年初聽中官得行三年服是刺史二千石下  
及中官皆不行三年之制也因文帝之顧命廢天下之  
通喪此非景帝之過歟或曰應劭注文帝紀謂三十六  
日釋服此以日易月也顏師古曰文帝自率己意創而  
為之非有取於周禮何為以日易月乎三年之喪其實  
二十七月豈有三十六月之文禪又無七月也應氏失  
之其說孰是曰劉貢父以翟方進傳三十六日為證則  
應氏不悞矣又攷唐常袞傳禮為君斬哀三年漢文帝

權制三十六日我太宗遺詔亦三十六日群臣不忍既葬而除畧盡四月高宗如漢故事玄宗始變天子喪為二十七日然則三十六日之制始於漢文帝二十七日之制始於唐玄宗可以證應氏之說辨顏氏之誤王元感著論三年之喪三十有六月譏詆諸儒張東之破其說而元感論遂廢漢以三十六日易月亦有是說矣若人君之禮諸儒之議茲不偏舉

以德化民

或問文帝以德化民有迹可言歟曰蘇氏謂紀無可書之事然非無可書也叙傳所述曰太宗穆穆允恭玄默化民以功帥下以德又曰我德如風民應如草帝之躬行本於寬仁恭儉玄默清淨風行俗成庶幾於勝殘去殺以帝之天資能興三代之禮樂復三代之制度則教化浹洽而王道成矣惜其有富庶之效未知聖王所以教民者也農不供貢臯不收孥宮不新館陵不崇墓四者皆帝之盛德其大者不輕於用兵也太史公律書載

其無議軍之詔繼以百姓無內外之繇得息肩於田畝  
天下殷富粟至十餘錢鳴鷄吠狗煙火萬里可謂和樂  
者乎又曰天下新去湯火人民樂業因其欲然能不擾  
亂故百姓遂安自年六七十餘亦未嘗至市井游教嬉  
戲如小兒狀孔子所稱有德君子者耶通鑑雖不書而  
以德化民之實於此可矣刑以不殺為能兵以不用  
為功財以不聚為富人以不作聰明為賢此蘇氏稱宋  
之仁也愚於文帝亦云



通鑑答問卷三